

## NC'ERA 'NA VOTA...

'Na vota nc'era ... dicu cu' nc'era:  
l'ànchi di Betta e lu... mussu di Chiara...

Nc'era la rrobba cu l'abbondanza  
E mmo la tèssara stringi la panza...

A ddui tri ssordi trovavi l'ova ;  
a vvinti liri mo, cu' li trova ?

Nc'eranu scarpi di pelli a ccroma  
chi ppe durata tu jivi a Roma...

'Na vota nc'era lu 'mpeghàtu  
grassu...tundu e mali pagàtu:  
mo, pagàtu a migghiàra di liri ,  
se ttu lu guardi...no 'u poi vidìri!

Nc'era 'na vota menzu re  
E lu cacciàru e mmo no nc'è...

Nc'è na Reprubbica taliana  
Chi mi pari 'na ...suttàna!

'Na vota nc'era l'onestà,  
cosa bbella 'mberità...  
e mmo l'affrìttu sbenturàtu  
no trova mancu... lu surrogàtu!

Nc'era l'ura tali e qquali,  
mo nc'è l'ura ma ... ligàli ...

'Na vota seppi ca nc'era unu  
'ncavarcàtu supa a nnu muru ,  
cu na mantella a rrota...

Voi mu ta cuntù n'àutra vota ?

'Na vota nc'era 'nu vecchiu  
Chi ccusìa 'nu saccu vecchiu  
Ogni cent'anni minava nu puntu...  
Aspetta docu ca mo t'è cuntù...

*Francesco Laruffa*

*[www.associazionelaruffa.org](http://www.associazionelaruffa.org)*